

sueti. Et se intese uno aviso a bocha, come la galia di Alexandria capitania, essendo a ferro era aperta et andà a fondi et perse la roba, et *tamen* le persone erano salve.

Fo il perdon ozi a la Scuola di San Marco di colpa e di pena, comenzò ozi a vespero e dura per tutto doman fin sol a monte.

Noto. È venuto uno indian frate di San Francesco, con uno altro di San Zane Polo, questo nome fra' Paolo . . . , erano guardiani di uno monte in Jerusalem, par lurchi l'habino ruinato, dove el dito è stato anni 37, et è partito, va per il mondo domandando lemosina, parla indian, porta in man certo son di campane et è fato come cimbanò, qual fa gran rumor; et cussì l'andava a tutti li altari di la chiesa di San Marco, cridando *alleluia, alleluia*, et in linguazo indian cridava l'è resussità Christo, et havia una fede dil vardian di San Francesco di la cha' granda.

A dì 10, Domenega, fo letere di Milan, dil secretario Caroldo, di . . . Scrive come monsignor di Telegni li ha ditto che 'l re di Romani vol venir in gran pressa in Germania per passar in Italia. *Item*, uno aviso come si ha per via di Zenoa, che a Tunis quel Re havia fato ruinar il castello a la Goleta e aterà il porto, dubitando di l'armada di Spagna; et che certo turco corsaro era con fuste a Zerbi. Et di uno orator turco stato a Tunis, qual è morto. *Item*, avisa di certà indulgentia publicada de li per uno frate, el qual trarà da ducati 10 milia, e tutto per la fabrica di la chiesa di San Pietro di Roma.

Fo leto do letere portade in Colegio per sier Piero Michiel, fo capitano di le galie di Barbaria, una scrive la comunità di Carthagenia, l'altra el marchexe de Velis et la terra di Murcia, che la Signoria voy far meter scala in diti lochi a le galie nostre vanno in Barbaria, prometendo farli oima compagnia, perchè sono desiderate da quelli popoli et contraterano ben; et scriveno, quando capitò de li el prefato sier Piero Michiel capitano, fu ben visto et carezato.

Da poi disnar, fo Gran Consejo, vicedoxe sier Andrea Baxadona. Fu fato un Censor in luogo di sier Daniel Renier, è intrado savio dil Consejo. Rimase sier Andrea Trivixan el cavalier, fo savio dil Consejo, qu. sier Tomà procurator, qual vene per scurtinio, come il tutto qui avanti si vederà. Io Marin Sanudo fui tolto per eletion e non in scurtinio, perchè non vulsi esser nominato. Mi tolse sier Marco Antonio Zorzi qu. sier Marco, qual cambiò

Iusticia vecchia per Censor. Di Pregadi niun passoe, ma ben tutte le altre voxe passoe.

Fu posto, per i Consieri, la parte presa in Pregadi a di 29 dil passato, zercha l' officio di Soraconsoli, e ave 1224, 82, 46; et fu presa.

Fo posto, per li Consieri e Cai di XL, poi legitimà le banche, dar le do Quarantie civil in la lite di Canali e Boldù, et si possino redur con quel numero se potrà aver, non obstante la parte in contrario. La qual lite è una intromission fata per li Auditori vecchi, di do sententie fate al zudegà di Proprio contra sier Zuan et Piero da Canal qu. sier Nicolò dotor in favor dil reverendo domino Gabriel e Zuan Batista Boldù e fradeli. Fu presa: 1041, 177, 17. Et nota. Per lege . . . la banca, intrò sier Marco Antonio Contarini avogador, et sier Jacomo Corner provedador di comun a meter dita parte.

Scurtinio di un Censor.

Sier Francesco Bolani, fo avogador di Comun, qu. sier Candian . . .	32.121
Sier Alvise Pasqualigo, fo Cao dil Consejo di X, qu. sier Filippo . . .	36.115
Sier Zuan Francesco Morexini, fo consier, qu. sier Piero	42.108
Sier Zorzi Pixani dotor, cavalier, fo savio dil Consejo	83. 70
Sier Zuan Dolfin, fo consier in Cypro qu. sier Daniel.	46.106
Sier Alvixè Zen, el provedador a le biave, qu. sier Francesco	43.107
Sier Moixè Venier, fo censor, qu. sier Moixè.	42.106
† Sier Andrea Trivixan el cavalier, fo savio dil Consejo, qu. sier Tomà procurator	94. 52
Sier Marco Arimondo, fo di Pregadi, qu. sier Christofolo.	41.109
Sier Hironimo Barbarigo, fo consier, qu. sier Beneto	43.103
Sier Gabriel Venier, fo avogador di Comun, qu. sier Domenego . . .	52. 94
Sier Andrea Magno, fo podestà a Verona, qu. sier Stephano	93. 59
Sier Francesco da Mosto <i>el grandò</i> , qu. sier Piero	35.117
Sier Faustin Barbo, fo avogador di Comun, qu. sier Marco	64. 82
Sier Troian Bolani qu. sier Hironimo.	54. 99